

տօնել Մայիս 28-ը. «Թո՛ղ Մայիս 28-ի օրը լինի զոհերի յիշատակին, բայց և համազգային մեծ ուրախութեան օր, — օ՛ր նոր պետութեան ստեղծման բերիական Արարատի շուրջը, օ՛ր ազգային բարձր իղձերի և համաշխարհային արդարութեան յաղթանակի»:

Նախարարների խորհրդի մայիս 27-ի նիստում, որին ներկայ էին Ա. Խատիսեանը, զօր. Արարատեանը, Ս. Մանասեանը, Քր. Վերմիշեանը, Ս. Թորոսեանը, Գ. Մելիք-Ղարազէոգեանը, Յ. Չմշկեանը և ուրիշներ, լսեց վարչապետի զեկուցումը այն բոլոր ձեռնարկների մասին, որոնք կատարւել էին Հայաստանի անկախութեան տարեգարձի օրը միութեան յայտարարութիւնը անելու համար և կարգացեց յայտարարութեան նախագիծը: Կառավարութիւնը հաւանութիւն տւեց արւած աշխատանքին, որոշեց, Հայ. Խորհրդի ապր. 27 օրէնքի հիման վրա, հաստատել յայտարարութեան նախագիծը և յանձնարարեց վարչապետին հրապարակել: Որոշեց նաև «հրաւիրել Հայաստանի Խորհրդի նիստերին մասնակցելու, որպէս Խորհրդի անդամներ, Արեւմտահայ Գործադիր Մարմնի 12 անդամներին»*):

Նոյն նիստում քննեց հանրային կրթութեան նախարար Գ. Մելիք-Ղարազէոգեանի առաջարկը՝ Հայաստանի անկախութեան և միութեան յայտարարութիւնը յաւելեցնելու համար 1) մայրաքաղաքում յուշարձան կանգնեցնել հայ ազատամարտում ընկած հերոսներին ի յիշատակ և այդ նպատակով կազմել հիմնադրամ՝ կառավարութեան կողմից յատկացնելով 100,000ռ. և 25,000ռ. էլ արձանի մրցանակաբաշխութեան համար. 2) հրատարակել հայկական ազատագրութեան վերջին շրջանի պատմութիւնը, որի համար տրամադրել 285,000ռ., 3) բաց թողնել առանձին չքանչան «Հայրենիքին մատուցած ծառայութիւնների համար» մակաւորութեամբ: Այս առաջարկն ևս հաստատեց միաձայնութեամբ:

Երկու օր յետոյ, մայիս 28-ին, Հայաստանի Խորհրդի հանդիսաւոր նիստում կատարեց Հայաստանի միութեան և անկախութեան յայտարարութիւնը:

Այդ օրը Երևանը ստացել էր տօնական կերպարանք: Ամբողջ քաղաքը զարդարւած էր դրօշակներով, գորգերով, կանաչներով ու ծաղիկներով: Վաղ առաւօտւանից փողոցները լիքն էին բաղմութիւններով: Շրջակայ գիւղերից քաղաք էին գալիս խումբ-խումբ գիւղացիներ, պատգամաւորութիւններ դրօշակներով՝ հանդէսներին մասնակցելու համար:

Առաւօտեան, քաղաքային ինքնավարութեան շէնքի ընդարձակ հրապարակում տեղի ունեցաւ հոգեհանգիստ հայրենիքի ազատութեան համար զոհւածների յիշատակին, ապա՝ մաղթանք և զօրահանդէս: Հրապարակն ու մօտակայ փողոցները բռնւած էին ծովածաւալ բաղմութեամբ, զօրքով, դպրոցական աշակերտներով, որբերով: Մէջտեղը տեղաւորւած էին Հայ. Խորհրդի ու կառավարութեան անդամները, բարձր հրամանատարութիւնը՝ զօր. Նազարբէգեանի գլխավորութեամբ, զօր. Դևին, Պարսկաստանի, Ազրբ-

*) Քաղաքի ցամաքային խորհրդի 1919թ. մայիս 27-ի նիստի արձանագրութիւնից: